

Poolu kadasi bo i kere fa maari GALATIYAFOM ni

¹⁻² Mini Poolu bo m ti Yesu Kristo jaramasa n ni ya ninbaam bo bu wo m do fen n kere, sukere ahin kadasi n ma ambere Kristo jama minem bo am wo Galatiya dee awore n nu n wo. Yesu Kristo ni ya Si Nyeme bo i tengeeri Kristo i yiwee n nu ni, afa m ayo i jaramasa, ma adamande yoori m a, bekun ma minem gusu faari juma n maari m a.

³ Ya Si Nyeme, ni ya Mibie Yesu Kristo buka am, na bu ma am ahoreda.

⁴ Ya Si Nyeme koroyanu n dee ti, na wo ma Yesu ade ya jinaabiri awu ya satie dee ti, adena i de ya fite ahin durunya tie n bo ya wo nu n nu.

⁵ Yiri ti ye ni ka minem kere kansi i sanga kere sanga. Ami.

Labari kpa kun n kpein n wo bere a

⁶ Am jore amie m bo m si ma kabo m kan. Kristo dee anunfo si ti, ye Nyeme afere am ka am ba su i, wo nya ce ma, ye am akaaki am sin abo i ndende, susu labari barasu be bo i wo i ngumi ni labari kpa n ni.

⁷ Labari kpa nyinga be wo ma bere, deke bo i ti na m se so n la ka, minem nbem koro ka bu ta am nyi wo, na bu fa kereewa barasu nbem kaaki Kristo labari kpa ni.

⁸ Ama, haari nzen yere be, wara nzen Nyeme mereke be fiteeri angoro ba kaanri labari barasu

be, na i ti má kabo ya du mɔ kaanri i ni, Nyeme yó i mi ngbeen.

⁹ Kabo ya du mɔ ase am ni, nyini ye m kaaki suse am bekun n a, ka, nzen be ba kaanri labari barasu be bo i wo i ngumi ni bo am ade i ni, Nyeme yó i mi ngbeen.

¹⁰ Bu ɲa m suyo m juma n ka mine kansi m wɔ, ama, i ti má sɔ, m koro ka m yo bo Nyeme kansi m wɔ, m suyo má sa bo mine se ka m ti kpa. Nzen má m ɲa m yo sa bo i sun mine nu, má m koro yo má Kristo akɔɔ.

Kabo Pɔɔlu ba yoori Kristo jaramasa barasu ni

¹¹ M ninbaam, m koro ka am si ka labari kpa n bo m kaanri i jɔɛ kereeri am ni, i ti má deke bo i fite adamande sunsunni nu wɔ.

¹² I ti má ka m deer i fiteeri adamande dɔɔ, má be gusu kaaki fa kereeri m a. Ama, Yesu Kristo ni i tii yiiri i kereeri m a.

¹³ Am yo tiiri kabo m woowa yo ti barasu, sanɲa bo m yo suuri Yudafoɔm dɛɛ atin n su ni. M yo kereeri Kristo jama n wuwuruwa agaya, na má m butu bu.

¹⁴ M yo suuri Yudafoɔm atin n su nahɔɛ su taraari m sara sufom dɔɲgu bo bu su nyini atin n su ni. M nyunu yo boroori agaya kabo m yo na m su ya nana sayoowam su.

¹⁵ Nyeme ahɔɔma n dɛɛ ti, sanɲa bo bu nya wu má m ni, ye i yiiri m ka m yo i juma n a. Sanɲa n bo i suunri Nyeme nu n ba juuri ni,

¹⁶ na wo yi i Wa n akere m, adena m ko kan i labari kpa n jore kere minem bo bu ti ma Yudafo m ni, ye ma ko ma be do na i ko kere m kabo m yo n a.

¹⁷ Ma kaaki ako ma Yerusalem mie kpiri n nu na m ko nu minem bo bu du mo ti Kristo jaramasam ni. M koori Arabiya asien n su wo, na ma fite do, na ma nya akaaki ako Damasiko mie kpiri n nu.

¹⁸ I dee afo nsan sin, na ma ko Yerusalem ka m ko nie Kefasi busu, yiri bo bu kaaki fere i ka Petoro ni, na ma ko awo i do een buru ni nnu.

¹⁹ Saŋga bo m woori do ni, ma nu ma Kristo jaramasam n be abuka ma su, ma ka Yakobo, ya Mibie niema ni.

²⁰ Noanie n bo m sukere ma am ni, i ti nahore wo, m bu ma kore. Nyeme ti m daanifo a.

²¹ Nyini sin na ma fite Yerusalem, na ma ko Siriya ni Silisiya dee aworem n nu.

²² Nyini saŋga Kristo jamam n bo bu wo Yudiya awore n nu n be nya nu ma m na bu ba si m,

²³ se ba ti ka mine na, "Ahin sono n yo kere ya wuwuruwa a, na i kun mine bo ba de Kristo labari kpa n na i mini bu, kisa i nati kan labari kpa n jore kere mine wo."

²⁴ Deke n bo Nyeme ma m koro yoori i n dee ti, na ba kansu Nyeme.

2

Poolu ni i beŋgu jaramasa nbem jore

¹ Saŋga bo ya fite Yerusalem mie kpiri n nu ni, i afo buru ni nna sin, na m ni Banabasi akaaki ako do bekun, na ya fa Titosi abuka ya nu su.

² Deke n bo i ti na m koori n la ka, Nyeme kereeri m ka m ko a. Na m ni Kristo jama nkpienkpienm n atien ya nɔɔ ya ngumi deke be, na ma kan ateke bu nyi, akere bu fa ko labari kpa n jore bo m kan kere minem bo bu ti má Yudafom ni. Dama ma koro má ka juma n bo m suyo i n kere ka ngbeen.

³ To, haari ni bo Titosi yo woori m do na i ti má Yudafom ni, ba mie má i ka i wura kenkenne.

⁴ Ama, be abisa má ya i jore be, se mine nbem ba sangari ya nu, bu yo bu nu ka bu ti Kristo dee minem wo. Bere seeri ka wo yo daka ka i wura kenkenne n a. Bu faari bu nu mataari ya a, adena bu nie kabo Yesu Kristo dee ti na ya nya ya tii ni. Má bu koro ka ya su noanie kpamaawa n su wo, na ya yo akoom.

⁵ Ama, na ya fa nu, ya ma má bu anyunu fieo, adena má be kaaki i sin bo labari kpa n bo i ti nahore, na ya kan kere am su.

⁶ Bere n bo mine bu bu ka bu ti nkpienkpienm ni, m cee awo má bu nu ka bu ti nkpienm, dama Nyeme tambu má nu, nyini nkpienkpienm n gusu ala má kaakiiwa bo bu kaaki m fa ko m labari kpa n su.

⁷ Se deke bo bu nuuri i n la ka, Nyeme ye wo yi m ka m kan i labari kpa n jore kere minem bo bu ti má Yudafom n a, kabo wo yi Petoro ka i kan i labari kpa n jore kere Yudafom ni.

⁸ Dama Nyeme ama m yiko ka m kan i labari kpa n jore kere minem bo bu ti má Yudafom ni, kabo wo ma Petoro yiko ka i kan i labari kpa n jore kere Yudafom ni.

⁹ Na Yakobo, ni Petoro, ni Yohane bo mine bu

bu ka bu ti Kristo jama mofom n anu ka, Nyeme ama m nyini juma n ka m yo i a, nyini dee ti, na ba fa bu saa awura m ni Banabasi saa nu, na ba de ya ni bu saa nnyo. Na ya kere asoro su ka m ni Banabasi ko yo juma ni minem bo bu ti ma Yudafom ni, na bere gusu ko yo juma ni Yudafom ni.

¹⁰ Ama, jore n bo bu seeri ya n la ka, ma ya wara fi yaarifom sa. Nyini ye m yo la anyumboro ka m yo i a.

Kabo Pɔɔlu jarakiiri Petoro barasu ni

¹¹ Ama, Petoro ba baari Antiyoki mie kpiri n nu na ma jaraki i, ma fie ma i su, dama sa n bo i yoori i ni, wo ko ma atin su.

¹² Saŋga bo i du mo ba tuuri ya ni, i ni ya ninbaa Kristofom bo bu ti ma Yudafom ni saŋga di diire a. Na mine nbem afite Yakobo do aba ka bu ba nie ya busu. Bu ba juuri ni, na wo cin i nu afite minem bo bu ti ma Yudafom n nu. I ni bere asaŋga adi ma diire kun, dama i soro Yudafom n ahore wo.

¹³ I yoori so ni, na Yudafom nyiŋgam bo bu wo Antiyoki n gusu ayo kabo i yoori ni. Bu si kabo ma bu yo, ama, ba yo ma so. Na Banabasi gusu ason bu su.

¹⁴ M nuuri ka bu su ma Yesu labari kpa n bo i ti nahore n su ni, na ma se Petoro jama n kere nyunu ka, “Woro, a ti Yudafom o, ama, u woowa ti ka bo bu ti ma Yudafom wo. Ye nzu ti ye a koro ka a mie minem bo bu ti ma Yudafom na bu wo kabo Yudafom wo barasu n a?”

Yarada dee ti ye sono kere nya tiide a

¹⁵ Nahore, ya fiteebiri, yere ti Yudafom wo, ya ti ma minem bo bu su ma Nyeme na ya fere bu ka satieyofom ni.

¹⁶ Ya si ka na nzen sono yo Yesu Kristo yarada, ye Nyeme de i mi ka i yo sa bo i ko atin su i do a, ama, i ti ma ka i mi su Nyeme nonie kpamaawa n su, ye Nyeme de i ka i yo sa bo i ko atin su i do a. To, ye yere gusu ayo Yesu Kristo yarada, adena Nyeme de ya ka ya yo sa bo i ko atin su i do, i ti ma ka ya su nonie kpamaawa n su n dee ti a. Dama be wo ma bere bo i su nonie kpamaawa n su na Nyeme de i ka wo yo sa bo i ko atin su i do.

¹⁷ Kabo ya boro ya nyi na ya su Kristo su na Nyeme de ya ka ya yo sa bo i ko atin su i do ni, nyini kere ka yere Yudafom gusu ti satieyofom ka minem bo bu ti ma Yudafom ti n wo. Ama, nyini n sukere ma ka Kristo subuka minem na bu yo satie wo lee. Ai, i ti ma so.

¹⁸ M yo su nonie kpamaawa n su wo, ama, ma yaki i, nzen kisa na m na m kaaki bo i bu su i su bekun, nyini sangha, ma fa m nu ayo satieyofom lee nahore su.

¹⁹ Mini do, fa ko nyini nonie kpamaawa n su, i yo m ka ma wu wo, m su ma i su kun, adena m nya ngoo Nyeme do. I ti ka m ni Yesu Kristo asangha awu baka jaanu n su a.

²⁰ Ahin ngoo n bo m la i ni, durunya n nu fen ni, yiri Nyeme Wa n koro m dee ti, na wo wu ama m, na ma yo i yarada, nyini dee ti ye m la ngoo n a.

²¹ Ma kete ma kabo Nyeme ayo ya sakpa akere i koro barasu ni. Ama, deke bo m suse n la ka,

nzen sɔnɔ ɲa i su nɔaniɛ kpamaawa n su, na nyini kere ka wɔ yo sa bo i kɔ atin su Nyemɛ dɔ, nyini la ka, yiwee n bo Kristo wuuri i n ti ɲgbɛɛn wɔ lɛɛ.

3

Nɔaniɛ kpamaawa n ni yarada jɔrɛ

¹ Ambɛrɛ Galatiyafom, am la má ɲɔnɔlɛ wɔ. Nɲma adadaka am a? M yo seeri am, kabo Yesu Kristo wuuri baka jaanu n su barasu ni, ma fie má am su.

² Am ma m bisa am ahin bisaawa ni, am suuri nɔaniɛ kpamaawa n su n dɛɛ ti, ye am deerɛ Nyemɛ Awiewiɛ Casi n a? Wara nzen bo am tiiri Yesu labari kpa n jɔrɛ na am yoori yarada n dɛɛ ti, ye am deerɛ i a?

³ Nzu ti ye am la má ɲɔnɔlɛ sɔ a? Am boori i bu ni Awiewiɛ Casi n wɔ, ye i baari sɛ ye am koro ka am fa am fanɲa wiewie i a?

⁴ Deke n kere bo Nyemɛ ayo i na am aɲu i n ti ɲgbɛɛn wɔ lɛɛ, nzen sɛ? Mini dɔ, i ti má ɲgbɛɛn.

⁵ Bo am ati labari kpa n na am ayo yarada n dɛɛ ti, ye Nyemɛ afa i Awiewiɛ n ama am, ye Nyemɛ yoori alekutura sam am nu a, nzen bo am su nɔaniɛ kpamaawa n su n a?

⁶ Nyini ye ba kere i Nyemɛ Jɔrɛ Kadasi n nu ka, “Abraham yoori Nyemɛ yarada n dɛɛ ti, ye Nyemɛ ade i ka i yo sa bo i kɔ atin su i dɔ n a.”

⁷ Nyini kere ya ka, bo ba yo Nyemɛ yarada ni, berɛ ti Abraham busu nufom nahɔrɛ su a.

⁸ Nyemɛ Jɔrɛ Kadasi n kere ka, minem bo bu ti má Yudafom bá yo Nyemɛ yarada, na i de bu ka ba yo sa bo i kɔ atin su i dɔ. Nyemɛ du mɔ

kaanri labari kpa n jore kereeri Abraham wo, na wo se i ka, “Woro dee ti, ye m yo adamande kere kisi a.”

⁹ Nyini ti, sono kere bo i yo yarada, Nyeme yo i kisi, kabo Abraham yoori yarada, na Nyeme yoori i kisi barasu ni.

¹⁰ Sono kere bo i su noanie kpamaawa n su na i sunsun ka Nyeme de i ka wo yo sa bo i ko atin su, Nyeme noo di i mi. Dama ba kere i Nyeme Jore Kadasi n nu ka, “Nyeme noo di sono kere bo i na i su noanie kpamaawa n su, na i su ma i kere kpakpati su ko wie ma.”

¹¹ Ya si ka, ma ka sono su noanie kpamaawa n su ye Nyeme de i mi ka i yo sa bo i ko atin su i do a. Dama ba kere i Nyeme Jore Kadasi n nu ka, Nyeme na, “Sono bo i yo sa bo i ko atin su m do, i nya ngoo, i yarada n dee ti.”

¹² Noanie kpamaawa n wo bere i ngumi, na yarada n bo ya yo Nyeme n gusu wo bere i ngumi. Ba kere i Nyeme Jore Kadasi n nu ka, “Sono kere bo i su noanie kpamaawa n kere su, i mi nya ngoo.”

¹³ Ama, sono kere bo i su noanie kpamaawa n su, Nyeme noo di i mi, nyini dee ti ye Kristo kaari ngbeen wuuri baka jaanu n su deeri ya tii jiiri n a. Dama ba kere i Nyeme Jore Kadasi n nu ka, “Nyeme yo sono kere bo ba sense i baka n su ngbeen.”

¹⁴ Deke n bo i ti na Yesu Kristo wuuri nyini yiwee n la ka, noanie n bo Nyeme diiri i di ni Abraham ka i yo minem bo bu ti ma Yudafom kisi ni, nyini dee ti, nzen ya yo Kristo yarada, Nyeme na i ma ya Awiewie Casi n bo wo di i di

ka i fa ma ya ni.

Sesesu n bo Nyeme diiri i di ni Abraham n jore

¹⁵ M ninbaam, m koro ka m fa adamande woowa na m fa kere kabo Nyeme woowa ti barasu. Nzen mine nnyo afa sesesu adi i di ka bu yo deke be, sɔnɔ wo má bere bo i koro kete i, wara i kaaki i.

¹⁶ Nyini ti, Nyeme diiri nyini di n ni Abraham ni i busu nufɔ n wɔ, wɔ se má ka i busu nufɔm kere, ama, i ɲa i busu nufɔm kun, yiri la Kristo.

¹⁷ Deke bo m suse n la ka, Nyeme yo faari sese-su wɔ, na wɔ di i di ni Abraham ka i yo i. Na i dɛɛ afɔ yaa nna ni afɔ aburasan sin, na wɔ fa i nɔanie kpamaawa n ama Moyisi, ama, sesesu n bo wɔ du mɔ adi i di ni, i koro saaki má i.

¹⁸ Sesesu n bo Nyeme diiri i di n dɛɛ ti, ye Nyeme ceeri Abraham aceeri n a. Má ka bo i su nɔanie kpamaawa n su dɛɛ ti ye i ce i aceeri n a.

¹⁹ Nzen i ti sɔ, nzu ti ye Nyeme ma Moyisi yo faari i nɔanie kpamaawa n maari minem a? Nyeme koro ka mine si kabo satie n ti wɔ, ye i faari i nɔanie kpamaawa n maari a, fa kɔ ju sanga bo Abraham busu nufɔ ni bá ba. Yiri ye Nyeme diiri i di ni Abraham n a. Nyeme yo faari i nɔanie kpamaawa n maari i merékem wɔ, na ba kan akere Moyisi bo i wo Nyeme ni i minem afien, na i gusu anya akan akere minem ni.

²⁰ Nyeme yo faari i nɔanie kpamaawa n maari merékem, ni Moyisi wɔ, ye bu kan kereeri minem a, ama, sesesu n bo Nyeme yo diiri i di ni Abraham ni, be wo má bu afien, se Nyeme ɲgumi.

Deke n bo i ti na Nyeme faari i noanie kpamaawa n maari i ni

²¹ Noanie kpamaawa n kete dekem bo Nyeme seeri ka i yó i ni, nzen se? Ai, i kete má. Nzen má noanie kpamaawa n be wo bere bo i koro ma ngoo, nyini la ka, nzen sono suuri noanie kpamaawa n su, ye Nyeme de i ka i yo sa bo i ko atin su i do a.

²² Ama, ba kere i Nyeme Jore Kadasi n nu ka, sono kere ti satieyofo o, adena minem bo bu yoori Yesu yarada ni, bere nya deke n bo Nyeme seeri ka i fa ma yaradayofom n a.

²³ Sangá bo Yesu nya ba má na ya yo i yarada ni, ya yo su noanie kpamaawa n su a, nyini noanie kpamaawa ni, i kere ya kabo ya yo, ye i nie ya su a, haari ba fa juuri sangá n bo Yesu baari na ya yo i yarada ni.

²⁴ Nyini ti, kana Yesu bá ba ni, noanie kpamaawa n ti ka sono bo i bita ya a, haari na Yesu aba aba, adena Nyeme de ya ka ya yo sa bo i ko atin su i do, ya yarada n dee ti.

²⁵ Ama, ahin sangá n bo ya yo Yesu yarada ni, noanie kpamaawa n bita má ya kun.

²⁶ Ambere kere bo am ayo Yesu Kristo yarada ni, nyini dee ti ye am ayo Nyeme nbaam a.

²⁷ Ambere kere bo bu biëri am Nyeme nzue ni, am ni Kristo ayo kun lee, nyini kere ka am ade i dee woowa n wo lee.

²⁸ Nyini ti, kabo am ni Kristo ayo kun ni, am kere ti deke kun wo lee. Bo bu ti Yudafom ni bo bu ti má Yudafom, bo bu ti akoonbaam ni bo bu ti má akoonbaam, nbiesom ni nbaram kere akaaki deke kun wo lee.

²⁹ Kisa am ti Kristo dɛɛ minɛm wɔ, nyini la ka, am ti Abraham busu nufɔm wɔ, bo am nyá deke n bo Nyɛmɛ seeri ka i fá ma i minɛm ni.

4

¹ Deke n bo m suse am la ka, awurubaa bo i bá di i si nɛnge n kɛɛ aja, na i nyunu nya ti má ni, i ni akɔɔbaa ti kun wɔ, haari bo i si aja n kɛɛ ti i dɛɛ ni.

² Saɔga bo i toko ti kaan ni, i wo i minɛm saa nu wɔ, ye bu niɛ i su a, haari fa kɔ ju saɔga bo i si seeri ka i di aja ni.

³ Ya gusu yo ti sɔ ɔ lɛɛ, dama saɔga bo ya yo si má Yesu jɔɛ ni, ya yo ti akɔɔm wɔ, fa kɔ durunya n nu satɛ yoowam su.

⁴ Ama, saɔga n ba juuri ni, na Nyɛmɛ asunma i Wa, na ba wu i kabo bu wu adamande ni, nɔaniɛ kpamaawa ni bita i a,

⁵ adena i koro de minɛm bo nɔaniɛ kpamaawa n bita bu n tii ji, na bu yo Nyɛmɛ nbaam nahɔɛ su.

⁶ Ya ti Nyɛmɛ nbaam dɛɛ ti ye i sunmaari i Wa n dɛɛ Awiewiɛ n ka i ba wura ya ahorembaa su. Nyini ti, ye ya koro bo fere Nyɛmɛ ka, “*Abba*,” i bu la ka, “*M Si*.”

⁷ Nyini ti, a ti má akɔɔ kun, a ti Nyɛmɛ wa a. Nzen a nya ti Nyɛmɛ wa, nyini la ka, i má u deke n kɛɛ bo i fa ma i nbaam ni.

Kabo Pɔɔlu cɛɛ woori Galatiyafɔm nu ni

⁸ Saɔga bo am nya si má Nyɛmɛ ni, am yo suuri dekem bo bu ti má Nyɛmɛ n wɔ, ye am ayo bu akɔɔm a.

⁹ Ama, kisa, am asi Nyeme, wara yiri Nyeme asi am. Nzu ti ye am koro ka am kaaki am sin bo Nyeme a, na am su durunya n nu satie yoowam, bo bu la má fanga n su a? Nzu ti ye am koro ka am yo bu akoom na am kaaki su bu bekun a?

¹⁰ Am nyunu aboro ceenkpirim ni yoowam n su a, bere la yoowa n bo am bu lemocue kere ni, ni bo am yo i sara kere ni, ni bo afo ba ye na am yo bu ni.

¹¹ M koro má ka juma n kere bo ma yo i ama am n ka ngbeen, nyini ti ye am sayoowa kpie m daafiri ceen kere n a.

¹² M ninbaam, m susere am wo, am ma am woowa ti kabo m woowa ti barasu ni, dama m woowa ti kabo am woowa ti n wo. Am ado má mini ngasi be.

¹³ Am si ka sanga bo m du mo ba kaanri labari kpa n jore kereeri am ni, m yo la má laifie n dee ti, ye m koro nyaari atin a.

¹⁴ Haari ni bo m yo la má laifie n kere ni, na i yoori kekereke ma am ni, am akete má m, abu má m ngbeen, ama, am deeri m ni am saa nnyo o, kabo má am de Nyeme merake wara Yesu Kristo barasu n wo.

¹⁵ Nzu ti ye kisa am ahore ti má jowa kabo i yo ti dawa n a? Nyini sanga ni, mini mmoo ni m tii si ka, nzen má m yo seeri ka am lokoti yi am nyumbaa fa ma m, na má am koro yo i, má am yó i wo.

¹⁶ Bo m tu am fo seeri am nahore n dee ti, ye kisa ma kaaki am kprof a?

¹⁷ Nyini minem bo bu boro bu nyi na bu cee wo am nu ni, bu sunsunni ti má kpa. Bu koro ka

am kaaki yaki Kristo atin n wɔ, na am boro am nyi su bu dɛɛ atin n su.

¹⁸ Nzen má am nyunu aboro nahɔɛ su ka am yo sakpa sangɔ kɛɛ, má i ti kpa, nzen haari m wo má am dɔ mmɔɔ.

¹⁹ M nbaam, am jɔɛ yo m yaa, kabo bara ba suwu baa na i yo i yaa barasu n wɔ, i suyo m yaa sɔ ɔ, má ka Kristo aba awo am nu, na am woowa ti kabo Kristo woowa ti barasu ni.

²⁰ M ahore su, má m koro ka m wo am dɔ kisa, na m da m bɔɛ na ya bo anzama, dama ma tanda fa kɔ am dɔ.

Saara ni Haga woowa n dɛɛ jɔɛ

²¹ Ambɛɛ bo am koro ka am su Nyɛmɛ nɔaniɛ kpamaawa n su ni, am si má kabo i nɔaniɛ kpamaawa n kere n wɔ, nzen sɛ?

²² Ba kɛɛ i Nyɛmɛ Jɔɛ Kadasi n nu ka, Abraham yo la nbaa nbiesɔm nnyɔ ɔ, baa n bo afani n wuuri i ni, ni baa n bo awurubara wuuri i ni.

²³ Baa n bo afani n wuuri i ni, kabo bara kɛɛ nyinɛ, na bu wu baa ni, i nyinɛ wuuri i sɔ ɔ. Ama, awurubara n dɛɛ wa n bo i wuuri i ni, kabo Nyɛmɛ yo seeri Abraham n ye i wuuri i a.

²⁴ Kabo nbara nnyɔm woowa n ti má kun na bu woowa wo i ngumi ni, i la bu wɔ. Bu ti ka sesesu nnyɔm bo Nyɛmɛ diiri i di n wɔ. Kun la Haga, afani n bo i dɛɛ busu nufɔm ti akɔɔm ni. I kere kabo Nyɛmɛ nɔaniɛ kpamaawa n bo i yo fa maari Moyisi Sinayi Buka n su n maari minɛm yoori akɔɔm barasu n wɔ.

²⁵ Haga ade Sinayi Buka n bo i wo Arabiya asien n dɛɛ jinaabiri wɔ, i ti ka Yerusalem miɛ

kpiri n bo i wo durunya n nu fen kisa n wo, i ni i busu nufom kere ti akoom wo.

²⁶ Ama, Yerusalem n bo i wo angoro n dee minem anya bu tii, bere ti awurubara Saara dee nbaam a, yiri ti ya ni a.

²⁷ Dama ba kere i Nyeme Jore Kadasi n nu ka, "Woro bara noroka ni, bo a wu ma baa ni, ma u ahore jo ko sin su.

Tien, na a siri ni ahorejo,

woro bara n bo a si ma baawu yaari ni,

dama bara n bo i hun akete i n la nbaam

tara bara n bo i la hun ni."

²⁸ M ninbaam, kisa ambere ti ka Izaki bo i ti awurubaa n a, dama yiri ye Nyeme seeri Abraham ka bu wu i n a, ye ambere gusu ti Nyeme nbaam n a.

²⁹ Kabo nyini sanga na afani n wa n yo kereeri awurubara n wa Izaki n wahara ni, yiri ye bu wuuri i ni Awiewie Casi n dee yiko nu a. Minem bo bu su Moyisi noanie kpamaawa n su ni, sumie yere n bo Nyeme Awiewie n yiko nu na ya kaaki Nyeme nbaam n so lee.

³⁰ Nyeme Jore Kadasi n se se wo? I na, "Fon yi ahin afani n ni i wa n fite fen. Wo ti ma ye ni ka ahin bara n wa n nya aja nenge n be. Ama, i ti ye ni ka awurubara n wa ni fa i kere a."

³¹ Nyini ti, m ninbaam, ya ti ma afani n dee nbaam, ama, ya ti awurubara n dee nbaam wo.

5

Kabo ya bita ya tiide n bo ya nya i n kenken

¹ Kristo ade ya tii aji, nyini ti, am wo ni nyini tiide n bo am anya i n nu, am bita i kenken na má am wo ka am ti akoom kun.

² Am ti kabo mini Pɔɔlu suse am ni. Nzen am soro su na be wuraari am kenkenne, nyini la ka, deke n bo Kristo ayo ama am n ti ngbeen wo lee.

³ M koro ka m bobo am wo lee bekun, ka sono kere bo i soro su na bu wuraari i kenkenne, wo yo daka ka i mi su noanie kpamaawa n kere su, má i yaki kun n kpein mmoo.

⁴ Ambere bo am sunsun ka am su noanie kpamaawa n su, na am na nyini ma Nyeme de am ka am yo sa bo i ko atin su i do ni, am ni Kristo akaaki lee, am di má Nyeme ahoroma n kun.

⁵ Ama, yere yiri, Awiewie Casi n ama ya yo yarada, ye ya la ahoresi nminda ka Nyeme ba de ya ka ya yo sa bo i ko atin su i do.

⁶ Nzen ya ni Kristo ayo kun, na ya wura kenkenne, i ti má pui, nzen ya wura má kenkenne gusu, i ti má pui. Ama, nzen ya yo Yesu Kristo yarada, na ya koro ya bengum na ya yo sakpa, nyini ti jore n a.

⁷ Kabo am yo su Kristo atin n su ni, am yo boro am nyi wo nahore su. Kisa nma adaka am ye am akaaki am sunsunni ka má am de nahore n a?

⁸ Nyini noanie n bo ba fa akaaki am sunsunni n fite má Nyeme bo wo fere am ka am ba su i n do.

⁹ Bu na, ayiri n bo bu fa go kpono nu n ti kaan so o, ama, yiri ma i yasu yo dongu a.

¹⁰ Ama, m la ahoresi fa ko am do, kabo ya ni ya Mibie Yesu Kristo ayo kun ni, ka, am kaaki má am sunsunni na am yaki atin n bo ya bita i ni.

Sono kere bo i koro ka am kaaki am sunsunni ni, Nyeme cin i mi sui.

¹¹ M ninbaam, nbem na m toko nati kan i ka i ti ye ni ka Kristo minem kere wura kenkenne. Nzen ma i ti nahore ka m kan i so o, ye nzu ti ye Yudafo m kere m wuwuruwa n a? Nzen ma m kan i so, ye haari nzen m kan fa ko yiwee n bo Yesu wuuri i baka jaanu n su ni, ma i ti ma jore.

¹² Minem bo bu mie am ka am wura kenkenne ni, ma i yo m fie ka bu sa bu nu na ma bu bieso dika yo juma.

¹³ M ninbaam, Nyeme afere am ka i de am tii ji wo. Ama, ma am nie ka am anya am tii n dee ti, na am yo am kunnu koroowa, ama, am koro am bengu nahore su, na am buka am bengu.

¹⁴ Dama Nyeme noanie kpamaawa n kere jina noanie maawa kun su a, yiri la ka, "Koro u bengu kabo a koro u nu ni."

¹⁵ Ama, nzen sanja kere na am sudi aluwa na am nuni sukpi am bengu nu, na am asi ma am nu sa, am saaki am nu nu wo lee.

Nyeme Awiewie n ni adamande woowa

¹⁶ M suse am wo, am wo kabo Awiewie Casi n kere am ka am wo ni, adena ma am yo am kunnu koroowa kabo dawa na am yo yoori barasu ni.

¹⁷ Dama deke bo yere adamande kunnu koro i ni, Awiewie Casi n koro ma i, ye deke bo Awiewie Casi n koro i ni, yere adamande dee woowa n koro ma i. Nyini ti, sanja kere yere adamande dee woowa n ni Awiewie Casi n se akuruwa ni i bengu wo. Nyini ye ya koro yo ma kabo ya koro ka ya yo n a.

18 Nzen am yo kabo Awiewie Casi n koro ka am yo ni, noanie kpamaawa n nie má am su kun.

19 Sono kere si kabo minem bo bu su adamande woowa su n ti barasu. Yiri la sakaraya, ni dangba sayoowam, ni konvikiya ngbeen-ngbeenm.

20 Na bu su amoe, ni ayiri di ngbeenngbeen, na bu sukpo mine, na bu sukpini jore, na bu susi kore, na bu sufa yaa, na bu suyo anyii sam, na bu suse akuruwa kpakpaaki bu nunu nu,

21 na bu susi bu bengum kore, [na bu sukun mine,] na bu sunu nzan bo, na bu suyo ngbeen-ngbeen kabo nzan nufom yo barasu ni, na bu suyo sa barasu nbem. Kabo ma du mo ase am ni, m toko bobo am wo lee, ka, sono kere bo bu yo nyini sam ni koro wura má Nyeme femeya n nu.

22 Ama, deke bo Awiewie Casi n ma mine yo i la ka, bu koro bu bengu, na bu la ahorejo, na bu ahorembaa ti daawa, na bu la mindi, na bu buka mine, na bu yo sakpa, na bu la dabunu,

23 na bu yo bu nu tarakam, na bu la tarabunu. Noanie kpamaawa be wo má bere bo i jaraki minem bo bu bita nyini woowa atin ni.

24 Minem bo bu ti Yesu Kristo deem ni, ba yaki bu dawa dee koroowa ni i sayoowam n kere, bu ti ka ba kpama bu baka jaanu n su ye ba wu a.

25 Awiewie Casi n ama ya ngoo. Nyini ti, am ma ya wo kabo i kere ya ka ya wo ni.

26 Má am ma ya wura ya nu kpiri, na má am ma ya yo sa bo i ye mine ahore su, na má ya si kore.

6

Kabo ya buka ya lamoko Kristofom barasu ni

¹ M ninbaam, nzen am nu ka am nu be suyo satie, amberε bo am wo kabo Awiewie Casi n kere ka am wo barasu ni, am tara am nu benle, na am buka i mi na i yo sa bo i ti kpa. Na am si am nu sa, na má am gusu yo satie be.

² Nzen am nu ka am benngu wo kekereke nu, am buka i. Nzen am yo so, nyini kere ka am ade Kristo kereewam n bo wo fa ama ya n nahore su leε.

³ Woro kere bo a ti má pui, na a sunsun ka a ti be ni, a dadaka u nu wo leε.

⁴ Sono kere nie i sayoowa, nzen i mi nu ka i sayoowa ti kpa, nyini sannga, i mi koro kansi i nu. Ama, má i nie ka i sayoowa tara i benngum deε ti, na i fa fo.

⁵ Dama sono kere la i tiengu sayoowa.

⁶ Amberε bo bu sukere am Nyeme noanie n ni, am buka bere n bo bu kere am ni, ni deke kere bo am la i.

⁷ Má am dadaka am nu, na am sunsun ka be koro dadaka Nyeme, dama deke kere bo sono yoori, Nyeme fá nyini to i mi kaari a.

⁸ Nzen sono yo kabo adamande woowa koro barasu ni, nyini má i mi wu a na i ka ngbeen. Nzen i yo kabo Awiewie Casi n koro ka i yo ni, nyini má i mi bá nya ngoo bo i la má awieeri a.

⁹ Nyini ti, má am ma ya fie ni sakpayo, dama nzen ya fie má, na sannga n ba juuri, Nyeme to ya nkato.

¹⁰ Nyini ti, nzen ya la deke ya saa nu bo ya fa yo sakpa, ya yo buka sono kere, maala ya lamoko

Kristofom ni, bere yiri, i ti ye ni ka ya buka bu sangha kere.

Awieeri su dɛɛ noanie bo Pɔɔlu fa kaari bu ni

¹¹ Am niɛ, mini ni m tii sufa m saa sukere ahin kereɛwa n ngbingbiri n kere ma am a.

¹² Minem bo bu miɛ am ka am wura kenkenne ni, bu koro ka mine kansi bu wɔ. Deke n bo i ti na bu yo sɔ n la ka, bu koro má ka mine kere bu wuwuruwa fa kɔ yiwee n bo Kristo wuuri i baka jaanu n su ni.

¹³ Bere bo ba wura kenkenne ni, bere mmɔɔ ni bu tii su má Nyeme noanie kpamaawa n su. Ama, deke bo i ti na bu koro ka am wura kenkenne n la ka, bu koro ka bu fa fɔ ɔ, ka, ba ma am asu bu dɛɛ yoowa n su.

¹⁴ Ama, mini yiri, m fɔ má yanfoya fa kɔ deke be su, má ka fa kɔ yiwee n bo ya Mibiɛ Yesu Kristo wuuri baka jaanu n su ni. Nyini yiwee n bo i wuuri i n dɛɛ ti, mini dɔ, m bu durunya n ka i ti ngbeen wɔ, na durunya n gusu bu m ka m ti ngbeen wɔ.

¹⁵ Dama nzen sɔnɔ su Kristo atin n su na wɔ wura kenkenne, i ti má pui, wɔ kaaki awura má kenkenne gusu, i ti má pui. Deke bo i ti jɔre nahore su n la ka, i ti ye ni ka mine nya wo fɔfɔre bo i fite Nyeme dɔ ni.

¹⁶ Nyeme ma sɔnɔ kere bo i su ahin atin n bo m kere n su ahoreda, na i si bu anunfo, dama bere ti Nyeme minem bo bu ti Yisarelifom nahore su a.

¹⁷ Kisa m koro má ka be kpini jɔre be ma m kun, dama m la deke bo i wo m njunie su sukere ka m ti Yesu dɛɛ wɔ.

¹⁸ M ninbaam, ya Mibiε Yesu Kristo buka am
kere. Ami.

ΝΥΣΜΕ ΙΟΥΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

fe36d0e6-2a60-5e15-8d1c-8bf275389598